

AKASHVANI(AIR)**RNU: KOLKATA****Bengali TextBulletin****05-04-2026****Time: 1.30 PM**বিশেষ বিশেষ খবরঃ-

১/ প্রবীণ বিজেপি নেতা, প্রধানমন্ত্রী নরেন্দ্র মোদী আজ পশ্চিমবঙ্গের কোচবিহার থেকে দলের হয়ে রাজ্যে নির্বাচনী প্রচার শুরু করবেন। অন্য দিকে, মুর্শিদাবাদে দলীয় প্রচারে অংশ নিয়েছেন তৃণমূল কংগ্রেস নেত্রী, পশ্চিমবঙ্গের মুখ্যমন্ত্রী মমতা ব্যানার্জী।

২/ ভারত এখন ইরান সহ চল্লিশটিরও বেশি দেশ থেকে অপরিিশোধিত তেল আমদানি করছে বলে পেট্রোলিয়াম ও প্রাকৃতিক গ্যাস মন্ত্রী হরদীপ সিং পুরী জানিয়েছেন।

৩/ দিল্লি পুলিশের ক্রাইম ব্রাঞ্চ জাতীয় রাজধানীতে একটি ওষুধ পাচারচক্রের দুর্নীতি প্রকাশ্যে এনেছে।

৪/ ইরানে ভেঙে পড়া মার্কিন যুদ্ধ বিমানের নিখোঁজ চালককে উদ্ধার করা হয়েছে বলে জানিয়েছেন আমেরিকার রাষ্ট্রপতি ডোনাল্ড ট্রাম্প।

৫/ চিরাচরিত ধর্মীয় আবেগে আজ ইস্টার পালিত হচ্ছে।

৬/ আই পি এল ক্রিকেটে আজ সানরাইজার্স হায়দ্রাবাদ, লখনউ সুপারজায়ান্টস এবং রয়াল চ্যালেঞ্জার্স ব্যাঙ্গালুরু, চেন্নাই সুপার কিংসের মুখোমুখি হবে।

oooooooooooooooooooooooo

পশ্চিমবঙ্গে বিধানসভা নির্বাচনের দিনক্ষণ এগিয়ে আসার সঙ্গে সঙ্গে জোরকদমে শুরু হয়েছে প্রচারাভিযান। বরিষ্ঠ বিজেপি নেতা, প্রধানমন্ত্রী নরেন্দ্র মোদী আজ কোচবিহার থেকে রাজ্যে দলের নির্বাচনী প্রচার শুরু করবেন। ঐতিহাসিক রাস মেলা ময়দানে এজন্য বিজয় সংকল্প সভার আয়োজন করা হয়েছে। দুপুর তিনটে নাগাদ কোচবিহার বিমানবন্দর থেকে সড়ক পথে সভাস্থলে যাবেন তিনি। সভাকে ঘিরে জোরদার করা হয়েছে নিরাপত্তা ব্যবস্থা। প্রধানমন্ত্রীর নিরাপত্তা দল এবং স্পেশাল প্রোটেশন গ্রুপ, এস পি জি-র আধিকারিকরা ইতমধ্যেই সভাস্থলে নিরাপত্তা ব্যবস্থা খতিয়ে দেখেছেন। সম্পন্ন হয়েছে সেনাবাহিনীর হেলিকপ্টারের ট্রায়াল ল্যান্ডিংও। জানা গেছে, কোচবিহার ও আলিপুরদুয়ার জেলার ১৩-টি বিধানসভা কেন্দ্রের প্রার্থীদের সমর্থনে এই জনসভার আয়োজন করা হয়েছে।

০০০০০০০০০০০০০০০০০০

ভোটের প্রচারে মুর্শিদাবাদের সামশেরগঞ্জের সভায় আজ তৃণমূল কংগ্রেস নেত্রী মুখ্যমন্ত্রী মমতা ব্যানার্জী নির্বাচন কমিশনের ভূমিকার কড়া সমালোচনা করেন। রাজ্যের আধিকারিকদের যেভাবে বদলি করা হচ্ছে তাতে প্রশাসনিক কাজকর্ম ব্যাহত হচ্ছে বলে তার অভিযোগ।

এরসঙ্গেই তিনি জানান, ফরাঙ্কা থেকে মনোনয়ন প্রত্যাহার না করায় বিদায়ী বিধায়ক মনিরুল ইসলামকে দল থেকে সাসপেন্ড করা হচ্ছে।

উল্লেখ্য, ফারাঙ্কার বিধায়ক মনিরুল ইসলামের বদলে এবার সামশেরগঞ্জের বিধায়ক আমিরুল ইসলামকে ফারাঙ্কায় টিকিট দেওয়ায় ক্ষুব্ধ হয়ে গতকাল নির্দল হিসেবে মনোনয়ন জমা দেন তিনি।

এরপরে তিনি জিয়াগঞ্জ-আজিমগঞ্জ সভা করবেন। বিকেলে বহরমপুরে দলীয় প্রার্থীর সমর্থনে শোভাযাত্রা করার কথা রয়েছে তার।

০০০০০০০০০০০০০০০০০০

ভারত এখন ইরান সহ চল্লিশটিরও বেশি দেশ থেকে অপরিশোধিত তেল আমদানি করছে বলে কেন্দ্রীয় পেট্রোলিয়াম ও প্রাকৃতিক গ্যাস মন্ত্রী হরদীপ সিং পুরী জানিয়েছেন। ইরান থেকে তেল আমদানির ক্ষেত্রে অর্থ লেনদেন নিয়েও কোনও সমস্যা হচ্ছে না। সমাজমাধ্যমে এক বার্তায় শ্রী পুরী, ইরান থেকে অপরিশোধিত তেলবাহী একটি জাহাজ আর্থিক লেনদেন সংক্রান্ত সমস্যার জেরে দেশের ভাদিনার বন্দরের বদলে দিক পরিবর্তন ক'রে চীনের দিকে যাচ্ছে বলে সামাজিক মাধ্যমে ছড়িয়ে পড়া একটি খবরকে ভুয়ো বলে খারিজ করে দিয়েছেন। পরিচালনাগত বা বাণিজ্যিক কারণে এই ধরনের জাহাজ অনেকসময়ই দিক পরিবর্তন করে বলেও তিনি উল্লেখ করেন।

০০০০০০০০০০০০০০০০০০

উপ রাষ্ট্রপতি সি পি রাধাকৃষ্ণণ মানসিক শান্তি ও আত্ম-বিশ্লেষণের গুরুত্বের বিষয় তুলে ধরে বলেছেন, ধ্যান বা চিন্তন, সার্বিক ভাবে ভালো থাকার অন্যতম চাবি কাঠি। আজ নতুন দিল্লিতে অনুষ্ঠিত গ্লোবাল কনফারেন্স অফ মেডিটেশন লিডার্সে অংশ নিয়ে উপ রাষ্ট্রপতি বলেন, মনসংযোগ বা ধ্যান-মানসিক চাপ কমাতে, লক্ষ্যে অবিচল থাকতে এবং মানসিক স্থিতিস্থাপকতায় বিশেষ ভাবে সাহায্য করে।

(বাইট)

০০০০০০০০০০০০০০০০০০

রেলমন্ত্রী অশ্বিনী বৈষ্ণব বলেছেন, নতুন দিল্লি রেল স্টেশনের পুনর্নির্মাণ কাজ দ্রুতগতিতে এগোচ্ছে। সমাজমাধ্যমে একাধিক বার্তায় রেলমন্ত্রী বলেন, স্টেশনে যাত্রীদের স্বাচ্ছন্দ্য ও নিরাপত্তার স্বার্থে বহু পদক্ষেপ নেওয়া হয়েছে। তিনি বলেন, সুরক্ষাব্যবস্থা জোরদার করতে পনের হাজার এ আই ক্যামেরা বসানো হচ্ছে। প্রত্যেক রেল কর্মচারী এবং বৈধ বিক্রেতাদের পরিচয়পত্র প্রদান করা হবে। মন্ত্রী বলেন, শৌচাগারগুলি উন্নত করে তোলা হচ্ছে। ইতোমধ্যেই তার প্রাথমিক প্রস্তুতি সম্পন্ন। যাতায়াত ব্যবস্থা সুগম করতে নতুন দিল্লি রেল স্টেশনে সদ্য চালু হওয়া ভারত ট্যাক্সি পরিষেবাও এখন থেকে পাওয়া যাবে।

০০০০০০০০০০০০০০০০০০০

কেন্দ্রীয় কৃষি ও কৃষক কল্যাণমন্ত্রী শিবরাজ সিং চৌহান, একাধিক রাজ্যে ব্যাপক বৃষ্টিপাত ও শিলাবৃষ্টির কারণে ফসলের ক্ষতির কথা স্বীকার করে আধিকারিকদের ক্ষয়ক্ষতির হিসাবের নির্দেশ দিয়েছেন। তিনি কৃষকদের আশ্বাস দিয়ে বলেন, সঙ্কটকালে কেন্দ্রীয় সরকার কৃষকদের পাশে সর্বদা রয়েছে। অসময়ে বৃষ্টিপাতের কারণে কোন রাজ্যে কত শস্য ক্ষতি হয়েছে তা পর্যালোচনা করারও নির্দেশ দেওয়া হয়েছে। রাজ্যগুলির সঙ্গে সমন্বয়ের নির্দেশ দেওয়া হয়েছে

কেন্দ্রীয় কৃষিমন্ত্রী, রাজ্যের কৃষিমন্ত্রীদের সঙ্গে খুব শীঘ্রই বৈঠক করবেন বলে কৃষি ও কৃষক কল্যাণ মন্ত্রক জানিয়েছে।

০০০০০০০০০০০০০০০০০০০

দিল্লি পুলিশের ক্রাইম ব্রাঞ্চ জাতীয় রাজধানীতে একটি ওষুধ, পাচার চক্রের দুর্নীতি প্রকাশ্যে এনেছে। পুলিশ জানিয়েছে, এই ঘটনায় হাসপাতালের এক কর্মী সহ ৫ জন অভিযুক্তকে গ্রেপ্তার করা হয়েছে। তাদের কাছ থেকে প্রায় ৭০ লক্ষ টাকা মূল্যের ওষুধ উদ্ধার হয়েছে। উদ্ধার হওয়া ওষুধের মধ্যে মেরোপেনেম, সেফট্রিয়াক্সোন এবং র্যাবিস অ্যান্টিসেরামের মতো অত্যন্ত গুরুত্বপূর্ণ ওষুধও পাওয়া গেছে। দিল্লি পুলিশ জানিয়েছে, এই ওষুধগুলি রোগীদের বিনামূল্যে চিকিৎসা খাতে বরাদ্দ থাকলেও এই চক্রের মাধ্যমে অবৈধভাবে বিক্রি করা হচ্ছিল।

০০০০০০০০০০০০০০০০০০০

জাতীয় মেরিটাইম দিবস উপলক্ষে সমুদ্রপথ ও সমুদ্র পরিসর সংক্রান্ত ক্ষেত্রের সঙ্গে যুক্ত সকলকে শুভেচ্ছা জানিয়েছেন কেন্দ্রীয় স্বরাষ্ট্র মন্ত্রী অমিত শাহ। তাঁদের পেশাদারিত্ব এবং সাহসিকতা দেশের বিকাশে গুরুত্বপূর্ণ ভূমিকা পালন করে চলেছে বলে স্বরাষ্ট্র মন্ত্রী উল্লেখ করেছেন। সামাজিক মাধ্যমে এক বার্তায় তাঁদের কুর্নিশ জানিয়েছেন স্বরাষ্ট্র মন্ত্রী।

০০০০০০০০০০০০০০০০০০

দেশের প্রাক্তন উপপ্রধানমন্ত্রী বাবু জগজীবন রামের জন্মবার্ষিকীতে আজ প্রয়াত নেতার প্রতি শ্রদ্ধা জানাচ্ছে সারা দেশ। প্রধানমন্ত্রী নরেন্দ্র মোদী, লোকসভার অধ্যক্ষ ওম বিড়লা, কেন্দ্রীয় স্বরাষ্ট্র মন্ত্রী অমিত শাহ প্রমুখ সামাজিক মাধ্যমে পোস্ট করে দেশের বিকাশে তাঁর অবদানের প্রসঙ্গ তুলে ধরেছেন।

প্রশাসক হিসাবে জগজীবন রামের সাফল্য সুবিদিত। কেন্দ্রীয় খাদ্য মন্ত্রী এবং প্রতিরক্ষা মন্ত্রী হিসাবে তাঁর সাফল্য ইতিহাসের পাতায় জায়গা করে নিয়েছে। সমাজের দুর্বলতর গোষ্ঠীর প্রতিনিধি এই নেতা, দেশ স্বাধীন হওয়ার আগে থেকে গুরুত্বপূর্ণ নানা দায়িত্ব সামলেছেন। নেহরু মন্ত্রিসভা, শাস্ত্রী মন্ত্রিসভা, ইন্দিরা গান্ধী মন্ত্রিসভা এবং মোরারজী দেশাই মন্ত্রিসভার গুরুত্বপূর্ণ সদস্য ছিলেন তিনি।

০০০০০০০০০০০০০০০০০০

ইরানে ভেঙে পড়া মার্কিন যুদ্ধবিমানের নিখোঁজ চালককে উদ্ধার করা হয়েছে বলে জানিয়েছেন আমেরিকার রাষ্ট্রপতি ডোনাল্ড ট্রাম্প। সামাজিক মাধ্যমে পোস্ট করে ট্রাম্প বলেছেন, উদ্ধার হওয়া ঐ বিমানচালক আহত, তবে সেরে উঠবেন বলে আশা করা যায়। বিমান ভেঙে পড়ার পর তিনি ইরানের দুর্গম পার্বত্য এলাকায় আশ্রয় নিয়েছিলেন এবং তল্লাশির পর তাঁর খোঁজ মিলেছে।

শুক্রবার ইরান একটি মার্কিন F-15E বিমানকে গুলি করে নামায়। একজন চালককে এর আগে উদ্ধার করা গেলেও দ্বিতীয় জন নিখোঁজ ছিলেন। তাঁর খোঁজে মার্কিন যুক্তরাষ্ট্র এবং ইরান-দুই দেশেই তল্লাশি শুরু করে। মার্কিন তল্লাশি অভিযান চলার সময় আবার, আমেরিকার হেলিকপ্টার লক্ষ্য করে ইরানের জনজাতি গোষ্ঠীর সদস্যরা গুলি চালিয়েছে বলেও জানা গেছে। তাকে জীবন্ত ধরে দিতে পারলে, তেহরান পুরস্কারেও ঘোষণা করে।

০০০০০০০০০০০০০০০০০০

মার্কিন রাষ্ট্রপতি ডোনাল্ড ট্রাম্প হরমুজ প্রণালী উন্মুক্ত করে দেওয়ার জন্য ইরানকে ৪৮ ঘণ্টা সময় দিয়েছেন। সামাজিক মাধ্যমের এক পোস্টে তিনি লিখেছেন, গত ২৬ মার্চ তিনি বলেছিলেন, ইরানকে সমঝোতায় আসার জন্য দশ দিন সময় দেওয়া হচ্ছে। হয় তারা সমঝোতা করুক, নয়তো সবার জন্য হরমুজ প্রণালী খুলে দিক। তিনি গতকাল ইরানকে হুঁশিয়ারি দিয়ে বলেন, ৪৮ ঘণ্টার মধ্যে উপযুক্ত ব্যবস্থা না নিলে তাদের এর ফল ভোগ করতে হবে। তাদের বিদ্যুৎ উৎপাদন কেন্দ্রগুলির ওপর আক্রমণ চালানোর হুমকি দেওয়ার পাশাপাশি ট্রাম্প তাদের আরও একবার আলোচনায় বসার জন্যও আহ্বান জানিয়েছেন। ইরান অবশ্য আগেই ট্রাম্পের শান্তিচুক্তির শর্তগুলি একতরফা ও একেবারেই গ্রহণযোগ্য নয় বলে উড়িয়ে দিয়েছিল।

০০০০০০০০০০০০০০০০০০০

সংযুক্ত আরব আমিরশাহী জানিয়েছে, সৌদি আরবের সঙ্গে তাদের সীমান্তলাগোয়া রুবাইস এলাকায় তাদের এক পেট্রোরাসায়নিক কেন্দ্রে আজ সকালে হামলা চলেছে। দ্রুত সেখানে আগুন ধরে যায়। জরুরি পরিষেবা দল সেখানে পৌঁছে পরিস্থিতি নিয়ন্ত্রণে আনে। আবু ধাবির সরকারি আধিকারিকরা জানিয়েছেন, বোরৌজ পেট্রোরাসায়নিক কেন্দ্রে ওই ঘটনার জেরে উৎপাদন প্রক্রিয়া আপাতত বন্ধ করা হয়েছে।

০০০০০০০০০০০০০০০০০০

মার্কিন সেক্রেটারি অফ স্টেট মার্কো রুবিও প্রয়াত ইরানের শীর্ষ সেনা আধিকারিক কাসেম সোলেইমানির পরিবারের সঙ্গে যুক্ত দুই বিদেশী নাগরিকের “গ্রীণ কার্ড” বাতিল করেছেন। হামিদেহ সোলেইমানি আফশার এবং তাঁর মেয়ের স্থানীয় বসবাসের বৈধ অধিকার বাতিল হওয়ার সঙ্গে সঙ্গেই ফেডারেল এজেন্টরা তাঁদের আটক করে। বর্তমানে তাঁরা উভয়েই মার্কিন অভিবাসন ও শুল্ক আরোপকারী সংস্থার হেফাজতে রয়েছেন। রুবিও স্পষ্টভাবে জানিয়ে দিয়েছেন, যেসব বিদেশী নাগরিক মার্কিন – বিরোধী শাসন ব্যবস্থাকে সমর্থন করেন, তাঁদের আমেরিকায় থাকার অনুমতি দেওয়া হবে না।

০০০০০০০০০০০০০০০০০০

আই পি এল ক্রিকেটে আজ সানরাইজার্স হায়দ্রাবাদ, লক্ষ্মী সুপার জায়ান্টস-এর বিরুদ্ধে খেলবে। খেলা শুরু দুপুর সাড়ে তিনটেয়। অন্য ম্যাচে রয়াল চ্যালেঞ্জার্স বেঙ্গালুরু মুখোমুখি হবে চেন্নাই সুপার কিংসের। খেলা শুরু সন্ধ্যা সাড়ে সাতটায়।

oooooooooooooooooooooooooooo

oooooooooooooooooooooooooooo